



Komunikadu Imprensa
Tribunál Judisiál Primeira Instánsia Dili
10 Marsu 2025

Tribunál presiza estabelese mekanizmu própriu atu evita adiamentu la nesesáriu ne'ebé afeta direitu interveniente sira-nian no konfiansa públiku nian iha tribunál

Iha 04 Marsu 2025, Tribunál Judisiál Primeira Instánsia Dili la konsege prezide leitura desizaun ba krime tolu (3) mak hanesan krime obstrusaun ba autoridade públiku ho Nú. Prosesu 0157/24. DIBCR no krime maus-tratus ba kónjuje rua (2) ho Nú. Prosesu: 0234/24 PDDIL no Nú. Prosesu: 0107/24 DICMR tanba juis titulár ba kazu ne'e prezide hela julgamentu ba kazu seluk.

Antes ne'e, iha 27 Feveireiru 2025, tribunál mós adia leitura sentensa ba krime omisídiu negligente ho Nú. Prosesu: 0140/23 LIQTR, tanba juis titulár ba kazu refere ladauk elabora desizaun atu lee iha data markadu tanba prezide hela julgamentu ba kazu seluk mós.

JSMP observa katak alterasaun ka adiamentu ba julgamentu ne'e la'ós esperiénsia foun ida iha ita-nia tribunál sira. JSMP rejista katak dalabarak tribunál sira kustume decide atu adia ka kansela julgamentu sira ne'ebé marka ona sein komunikaun antisipadamente ba interveniente sira. Normalmente parte-sira ka interveniente sira simu informasaun kona-ba adiamentu ka impedimentu hirak ne'e bainhira sira iha ona tribunál. Grave liután mak iha kazu konkretu balun, tribunál rasik liuhosi ofisiál justisa labele fó justifikasaun klaru ba interveniente sira bainhira tribunál halo adiamentu. Relasiona ho kestaun ne'e bele asesu iha JSMP ninia publikasaun antes iha link: https://jsmp.tl/wp-content/uploads/Pozisaun-JSMP-Adiamentu-Kazu-sira-iha-tribunal_TETUM.pdf

JSMP fiar katak iha éra teknolojia informasaun ne'ebé avansadu tebes hanesan ohin loron, ida-ne'e la'ós prátika ne'ebé di'ak ka normál hela. Tribunál ka juis sira tenke explora solusaun ka estabelese mekanizmu komunikaun própriu ruma hodi komunika liuhosi telekomunikaun ka meu seluk hodi informa ba interveniente sira kona-ba adiamentu ne'e. Tribunál mós bele rekolla númeru kontaktu interveniente sira-nian liuhosi ofisiál justisa sira hodi halo kontaktu bainhira sirkunstánsia imprevistu sira-ne'e akontese.

Tribunál tenke prudente no sensível ba realidade sosio-ekonómiku comunidade ne'ebé hasoru sirkunstánsia no limitasaun oioin iha sira ninia moris lor-loron nian. Tribunál la bele haree ida-ne'e hanesan kestaun simples ka baibain de'it, tanba comunidade halo esforsu no ezersísiu oioin atu hetan kondisaun hodi to'o mai tribunál. Ate balun tenke ba buka impresta tutan osan hodi selu transporte mai tribunál, infelizmente bainhira sira to'o tribunál hein iha oras balun, tribunál liuhosi ofisiál justisa, simplesmente dehan katak julgamentu adia ba fali semana ka fulan oin.

“JSMP kompriende katak tribunál bele halo adiantu ba julgamentu bainhira adiantu ne'e indispensavel atu halo justisa di'ak. Maibé adiantu ba julgamentu sira ne'e tenke liuhosi mekanizmu própriu ida, hodi informa antes ba interveniente sira nune'e la prejudika interveniente ne'ebé lakon sira nia tempu no rekursu atu kumpri notifikasaun tribunál,” dehan Sra. Ana Paula Marçal, Diretora Ezekutiva JSMP.

JSMP konsiente katak situsaun sira ne'e akontese tanba menus rekursu umanu iha tribunál judisiál primeira instáncia sira. Bazeia ba dados ne'ebé JSMP asesu hosi tribunál relasiona ho kazu sira ne'ebé entrada ka (tama) iha Tribunál Judisiál Primeira Instáncia Dili iha tinan 2024, iha kazu krime no sivil hamutuk kazu 1.922. Númeru ida ne'e la inklui númeru kazu pendente sira hosi tinan 2023. Ho númeru juis ne'ebé limitadu, klaru katak tribunál sira hasoru duni dezafiu atu halo jestaun ho di'ak ba kazu sira no bele implika ba jestaun oráriu ba desizaun tanba juis sira latuir planu ka agenda ne'ebé sira rasik mak deside.

JSMP mós nota katak durante ne'e maski juis sira okupadu ho sira nia serbisu maibé dala barak sira la konsistente ho sira nia agenda. Purzemplu juis sira marka julgamentu ba iha tuku 09.00 dadeer, maibé dada to'o fali tuku 10.00 dadeer ka liu mak foin halo julgamentu. Situasaun sira ne'e mak JSMP hanoin kontribui ba adiantu tanba iha perturbasaun ba iha oras julgamentu.

Alende ne'e JSMP mós nota katak durante ne'e juis sira marka oráriu julgamentu kontinuasaun sira balun iha loron no oras ne'ebé hanesan de'it, nune'e tenke adia kazu ida ba loron no fulan seluk tanba juis sira nia agenda julgamentu nakonu ka soke-malu.

Mezmuke tribunál hasoru dezafiu oioin maibé atu asegura interveniente sira nia direitu ho di'ak, JSMP rekomenda :

1. Tribunál (juis) sira atu konsistente ho sira nia oráriu julgamentu no bainhira iha nesiedade ba halo adiantu urjente tenke informa antes ba parte interveniente sira hodi antisipa intervenente sira la lakon tempu no osan ba transporte atu to'o mai iha tribunál tanba interveniente sira balu laiha kbiit finanseiru atu selu transporte ba-mai to'o iha tribunál;
2. Autór judisiáriu sira presiza garantia efetividade iha prosesu krime grave sira ne'ebé envolve asaltu seksuál, omisídiu (oho), vítima labarik no krime violénsia doméstika. Ho nune'e, enkoraza vítima violénsia bazeia ba jéneru sira hodi uza sistema justisa formál;
3. Estadu presiza hasa'e rekursu umanu iha setór judisiáriu;
4. Implementa Lei Protesaun Testemuña liuliu relasiona ho reembolsu ba despeza ne'ebé hala'o tiha hodi deskola atu fó depoimentu ka deklarasaun sira.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl